

LX

1408-IV-26, Guadalajara.— Juan II al Concejo de Murcia dándoles a conocer las treguas que han sido firmadas con el rey de Granada. (A.M.M. Cart. Real 1391-1412, fol. 47r.)

Don Juan por la graçia de Dios rey de Castiella, de Leon, de Toledo, de Gallizia, de Sevilla, de Cordova, de Murçia, de Jahen, del Algarbe, de Algezira, e señor de Vizcaya e de Molina; al conçeio, e alcalles, e algulazil, e ofiçiales, e omes buenos de la çibdat de Murçia, salut e graçia.

Sepades que son firmadas treguas entre mi e el rey de Granada por siete meses que les començaron a quinze dias deste mes de Abril en que estamos e se acabaran a quinze dias del mes de Novienbre primero que viene.

Porque vos mando, vista esta mi carta que fagades luego pregonar las dichas treguas por los dichos siete meses, e las fagades guardar el tiempo de los dichos siete meses, so aquellas penas que son estableçidas para aquellos que quebrantan treguas puestas por rey e señor natural, e los unos e los otros non fagaades ende al por alguna manera so pena de la mi merçed e de diez mill maravedis a cada uno de vos por quien fincar de lo asy fazer e conplir.

Dada en la villa de Guadalajara, veynte e seys dias de Abril año del naçimiento del nuestro Salvador Ihesucrhisto de mill e quatroçientos e ocho años. Yo el rey. Yo la Reyna. Yo el Infante, e Sancho Romero la fiz escribir por mandado de los señores reyna e Infante tutores de nuestro señor el rey e regidores de sus reynos.

LXI

1408-V-7, Guadalajara.— Juan II a Anton Sanchez de Cordoba para que libre los diez mil maravedis de los adarbes. (A.M.M. Cart. Real 1391-1412, fols. 66r-v.)

Don Juan por la graçia de Dios reuy de Castiella, de Leon, de Toledo, de Gallizia, de Sevilla, de Cordova, de Murçia, de Jahen, del Algarbe, de Algezira, e señor de Vizcaya e de Molina; a vos Anton Sanchez de Cordova, mi recabdador mayor en el obispado de Cartagena con el reyno de Murçia este año de la data desta mi carta, salut e graçia.

Sepades quel conçeio e omes buenos de la çibdat de Murçia tienen de mi por merçed en cada año para la lavor e reparamiento de los muros de la dicha çibdat

